

摘藻堂四庫全書薈要

集部

欽定四庫全書薈要

集部

明詩綜卷

七十九至  
八十一

詳校官編修臣汪鏞



欽定四庫全書薈要卷二萬五百五十二

集部

明詩綜卷七十九

翰林院檢討朱彝尊編

翊 三十四首

翊字介人嘉興布衣有秋槐堂集

周青士云崇禎之季詩歸

盛行人沿竟陵流派介人崛起禾中惟唐音是  
尚惜知已寥寥阮窮以沒伯道無兒若教不祀  
良可悼也 沈山子云介人所居止破屋一間  
種牽牛小庭中曉露未晞即對花吟詠日課數  
詩旁精詞曲有紅情言榴巾怨詞苑春秋博浪  
沙諸傳奇頗慨 恍自喜遺稿多逸僅存百一而



已

靜志居詩話介人初擅詞曲後研聲詩志取多  
師不遺偽體其論詩於合處見離于離處求合  
啓禎之間大雅不作毅然以起衰自任而知者  
寥寥惟平湖陸職方嗣端心賞之嘗訪君於長  
水值君洗硯河頭挾之登舟家人不知也遍游  
茗雪乃返既而入越謁陳推官卧子方置酒送  
客君詩有前路夕陽外行人春草中之句卧子  
擊節曰此今之高三十五也為序其詩詞遭亂  
所居不戒於火惟餘小屋二間一供婦爨一吟  
詠其中有故人官府寮者造之不見尋卒于京  
口五言如江湖長至日風雪上方山驛路通秦  
遠峰陰入晉多枕柳千樹雨瘴霧百蠻天日氣  
淫秋雨嵐光變夕曛楓林依水盡雲物近秋多  
一二故人在飄零佳訊稀江山雄白下人物近

黃初山雪行人少江梅臘月多文章身後事丘  
隴夢中山白社違人日玄關閉子雲江山開一  
望吳越在孤舟七言如夜月旌旗五馬渡秋風  
草木八公山周道秋風行黍稷漢官春雨長蒲  
桃西蜀喻通司馬檄中山誇滿樂羊書秦塞忽  
驚三月火漢家空待貳師功三月晴風高戰鼓  
九江春雨下樓船鑄語高華  
此方虛谷所云律髓是也

### 銅雀謡

銅雀來起高臺銅雀落高臺作銅雀飛臺成基

### 天桃 三章

灼灼天桃花于中林顧子惠我寧不嗣音

天桃灼灼花于林薄遲子不至憂心鑿鑿  
陟彼南岡晨露瀼瀼匪岡則高我心孔勞

登臺

日暮登臺秋風鴈來慨然念遠離居寘懷躊躇千里靜  
言勞思爰有旨酒斟之酌之拔劍高歌哀音孔多沉吟  
忽斷中心奈何繁星告夕薄寒求衣明月不墮輕霜自  
飛稽山之東大海處之衆水所歸曾不盈而逶迤今古  
山川屢更嗚呼往者實多于生

民兵行

朝廷徵民兵移文下鄉縣  
縣官承選幕抽丁悉貧賤  
含悲釋耒耜努力負弓箭  
未諳邊塞苦先絕室家戀  
臘月到漁陽飛霜割人面  
來朝兩軍合生死期一戰  
吞聲告同列封侯爾所羨

牧牛詞

二月三月春雨晴渚田水暖  
芹牙生牧童驅牛出原隰  
細草青青牛可食夕陽短  
笛不見人吹過村南又村北

園桃

春花爛漫開春鳥間闐啼一朝坐見物華改鳥聲啼盡  
花成泥園中桃須老園中樹莫遣隨風到處飛飛出園  
中去

休洗紅

休洗紅洗多紅漸失曾記初著時人矜好顏色徒傷未  
敝成棄捐悔不作事慎從前

烏栖曲



深宮烏啼天未旦城頭擊鼓明星爛  
吳王宴罷星未稀  
繁霜落樹烏驚飛

官船曲 二首

礮中水勢急與石相抵  
牾月暗富春山官船乘黑去  
山中畏虎狼日斜閉門卧  
向夜官船來促人嚴守邏

靜夜思

虛帳含秋月高樓怨別情  
明河一萬里夜靜水無聲

長干曲

揚帆下長江日落秋雲起  
夜半聞鄉音知是長千里

江臯曲

為愛新妝好東臯出采蘋  
春江千里色解珮不逢人

會稽竹枝詞

秋風秋雨正淒淒  
荷葉荷花香滿溪  
越女蕩舟愁日暮  
歌聲盡在若耶西

楊柳枝詞

春寒殘雨日瀟瀟  
一曲驪歌上灞橋  
想到啼烏今夜宿

不教攀折最長條

清涼山寺

蒼山樹如蓋，乘高御清涼。  
地遠暑亦寒，江色明虛廊。  
層崖仰萬象，古寺崇榱梁。  
眼迷金銀界，鼻擁梅檀香。  
白雲照巖穴，有若日月光。  
極視但長嘯，凌風思翱翔。

寒夜談遷至

故人越江海，細雨連孤舟。  
叩門告飢乏，刺刺語不休。  
自從遠游歸，中塗歷窮愁。  
豈無相識人，掃迹如仇讐。  
腹值

今日飢問予能食不聞之發長嘆誠為吾道羞青眼古  
所難況於末世求伊余雖苦貧一飯君必留中園翦寒  
韭糟牀漉新菊酒酣兩耳熱率意成歌謳人生感行樂  
不醉非良謀

待范四不至

落日澹清輝幽人在林樾回看往來路蒼蒼翠微沒天  
高秋月空夜午星辰闕之子期不來長歌為誰發

宿董氏宛委山房

中夜虎渡水溪樹初風生颯颯吹哀湍衆山皆有聲深  
庭久無月黯然三四星憂人獨求醉釋此離居情

王貽上云

警拔  
可傳

### 寄沈十二

橫山生白雲鬱鬱半空起知君住其下獨宿白雲裏冬  
月靜巖扉寒泉滌心耳嗟予役風塵引領望之子

王貽上云

及格

### 江亭遇舊

老畏干戈滿愁聞羽檄頻鶯花射堂夕風雪故園春泉  
下悲先帝人間識舊臣空將垂白淚嗚咽對沾巾

二十七夜見月

纖月依微見愁人起四更暫將成死魄幾日又哉生花  
霧冥冥重星河湛湛傾鄰雞催薄曙知爾有同情

四十初度

不才吾老矣萬事一蹉跎今日尚如此他年知若何空  
囊初罷酒樂歲且狂歌每欲尋巢許無從訪薜蘿

送客還山右

春草太行山行人一騎還夕陽前路遠離夢索居閑鳳  
舉今誰匹鴻歸不可攀所悲流水意千里送潺湲

石城晚眺

客心正搖落獨上石頭城天遠垂垂下江寒混混平愁  
兼多病日老作異鄉情況值秋風後清砧急暮聲

村居

獨樹寒烟外孤村流水間偶隨花草去遠逐漁樵還川

暝罷垂釣日斜長掩關何年事高隱歸卧鹿門山

周青士云

全學

輞川

### 去越

步出越城門回首越城樹久客成故鄉徘徊不能去

### 客中九日

細雨成陰近夕陽湖邊飛閣照寒塘黃花應笑關山客

每歲登高只異鄉

沈山子云  
不失唐音

### 亂後得張子書



沁園秋草舊回車惜別西湖歎索居萬里河山經百戰  
十年重到故人書

露筋祠

野岸分流截海垠安歌誰復賽波神孤舟夜向祠前泊  
商女挑燈說露筋

漂母祠

一飯當年報所知王孫今日更何之平生自嘆無知己  
千里來尋漂母祠

維揚逢張子

輪蹄自送出吳關  
楚乙燕鴻信不還  
誰料十年兵火後  
故人今日在人間

夏錫祚

五首

錫祚字玄龍別字書巖長洲人補崑山縣學生  
有雪鴻堂詩草

詩話書巖五

古居然作家

化城菴舊是趙凡夫隱居處

入門無寸土起伏盡岬石其中窪者泉一一湛寒碧稍  
加斧鑿功構此幽人宅不忍山骨傷廬舍寧取窄崇卑  
就石勢為磴亦為壁雖行密室中犖确響行履軒廊倚  
斷壑渡以橋盈尺昔人棲遯處遠與市塵隔今為佛子  
廬筠籃有游客是時春事動山氣潤泉脈環轉軒櫺間  
漸聞聲澹澹岑樓面青巘飛翠坐來積西牕杏一枝鮮  
妍合畫格尚想寫生人玉臺去無跡

謂文夫  
人淑也

空山萬籟

靜鐘磬響晨夕

自紫蜺澗至旋螺頂

荒蹊尠人樵樵路僅可辨忽焉耳官清泉聲泠然善入  
谷山四合仰視天一綫陰陰冷翠滴竹色綠人面泉行  
如秋蛇赴壑隨所轉迴磴或阨之怒歎亦飛濺偃木傍  
石梁渡客攀援便故令坦塗隱不使門扉見路窮出階  
墀曲折趨古殿苔衣鹿胎斑亂點落梅片巖阿架精廬  
清閼獨所擅幽意領已永竒勝探未徧復尋來時路一  
步一繾綣夕陽照歸人紛紛下華甸

鄧尉妙高峰

茲峯昔言峻豈意乃平坦倚竹為幽深徧植萬竿滿蒼蔚四面來不使濃翠散春時此天地未屬鶯花管相去叢林遙所喜游蹤罕法侶罷逢迎經過便疏嬾勿嫌坐箕踞我佛亦偏袒第損趙州茶一喫至七椀豈惟小住佳直可適予館

度風篁嶺至龍井

不知何年代人家猶太古叢篁高百尺深密掩村塢寥

寂絕人聲濃綠滴環堵徑轉下坡陀丁丁響樵斧道旁  
萬松樹落落清可數叩門墮山翠竹裏僧開戶呼童汲  
新泉泉自石穴吐烹以淪茗牙炒焙初出釜客言香色  
絕僧意不自詗乍與佳勝辭迴顧失紺宇樹密天疑陰  
泉吼聲帶雨忽聞遠村雞有路出漁浦

詠龐德公

風塵擾天地不到漢沔東至人所栖息山靈護微躬力  
田自歿晦婦饁耕者翁羣雄戰四野雲表翔冥鴻靜中

有定鑒人倫識統宗詭辭對景升遺安樂貧窮豈知天  
下事已付南陽公方其拜牀下深意默已通漢燼既可  
噓匿影歸寵從采藥入鹿門世莫知所終神龍不見尾  
雲霧深濛濛

顧 卍 三首

卍字琢公一字山臣錢塘人有今年草

詩話山臣工繆篆詩不為格律所縛持論亦復  
不羈家居奇窘有桑門勸其修行以資來世福  
山臣笑曰不知前身是倚雞狗作之孽使我今  
生窮苦若從上人修行又不知來世是何雞狗

安享是福傳者以為笑端然  
正可發愚夫愚婦深省也

### 有夏

淫雨積洪澇八十有八日是月月小盡九十日餘一所  
剩無幾時夏令條云畢陽光久淪滔陰慘恣騰溢龍蛇  
起平陸鬪水入入室翳此白晝輝恐為魑魅叱阡陌匯  
為海何有蓬與篲人非金石軀浸寢自腰疾赤帝職烜  
赫位莫與甲乙豈問大火已秋冬竄為質江南號炎方  
古語亦妄述土山焦欲流說者第詆譎彼蒼奪農夏豈



有富民術無已請端策筮卦十之七其占不濡尾是日  
卜乃吉無何若木枝影向意表出朝光被畎畝疆理辨  
溝洫鉏鍤四五動田父不終逸時還衣我葛饑也樂我  
泌譬之出幽谷暗助忽自失又如殿後師師老撫軍實  
取勝在一伸安問嘗九絀無夏忽有夏有夏乃有秫有  
秫且釀酒以醉契玄謚

江臯

江臯有梅梅有枝青樓說君君不知水郭舟喧趁潮去

月落沙禽啼滿樹

夜思

疎雨乍過菡萏陂  
好風微動楊柳枝  
前溪後溪櫂歌歇  
夜半水明飛鷺鷥

陳道永二首

道永字非玄更名確字乾初海寧學生

詩話先生難經鏗鏗  
詩不求工然亦流暢

東董子

春風亭子雨迷離  
旅思紛紛憶舊知  
別去好山游幾處  
倦歸蕭寺記何時  
期君南閣尊前話  
看我西湖隄上詩  
莫謂兩人容易見  
滿頭白髮已如絲

偕吳仲木再游西谿

秦望歸來興尚賒  
幅巾筇杖入山窪  
迷離不記前朝路  
寂寞還開古寺花  
春水橋邊雲萬樹  
晚風亭外月千家  
可憐潦倒吳公子  
頻道西谿勝若耶

孫茂芝一首

茂芝字若英嘉善人有燕游稿

江南曲

少小住江南忘却江南好辛苦北游還喜見江南道

魏

平云口頭

語却佳

蔣之翹一首

之翹字楚樺秀水布衣甲申後隱于市

詩話楚樺居射襄城詳對楚辭晉書韓柳文集  
鏤板以行又輯樵李詩乘四十卷搜錄鄉黨先  
正詩無遺兼能備舉軼事使聽者忘倦晚  
年無子書籍散佚無餘詩乘亦已可歎也

泊

止櫂知何地携藜復有村落花緣艇出鬪鴨近人翻未  
乞田家火先邀野老樽百年知幾醉潦倒復誰論

沈自昌 一首

自昌字君克吳江人禮部主事琦子國子監生  
客夜聞笛

為夢西洲早閉門高樓橫笛正黃昏關山風月愁清夜  
楊柳梅花憶故園波起湘江飛落葉雨淋蜀道叫哀猿

沙場多少征人淚一曲吹來欲斷魂

沈自然 三首

自然字君服吳江人副使琬子居母憂不勝哀  
而卒其友私謚孝介先生有來思間情二集

江南樂

初景爛銀浦溘溘浮灘鵝儂情兩搖蕩持比春江色江  
深蓮子齊水暖鴛鴦栖不須更相問家住橫塘西橫塘  
連夾浦曲曲明如許誰打白蘋開前溪夜來雨雨霽上

南樓天高水影浮出門郎不見仍蕩采蓮舟

曉別曲

月沒星闌曉雞唱離人催起同心帳殘膏無燄淚花紅  
不語含顰兩相向安得紅輪葬海底千年長伴多情死  
從此人間無別離門前不種相思子

寄居湖上樓

藕葉將凋桂葉濃隔湖隱隱見雷峰獨松關口秋聲急  
并入南屏寺裏鐘

沈自徵一首

自徵字君庸吳江人亦副使琬子辟賢良方正  
不就

詩話沈氏多才自詞隱生環訂正九宮譜為審  
音者所宗而君庸亦善填詞所撰鞭歌伎灞亭  
秋諸雜劇慨當以慷世有續錄鬼簿者  
當目之為第一流詩則嫌其稍平衍也

和施壘山學博送別韻

首宿闌干春漸肥榆關溟海鴈書稀管城亦有封侯骨  
磨盾看君試短衣



沈自友 一首

自友字君張吳江人都御史珣子承父蔭入國  
子監有綺雲齋稿

平沙灘

雲淡迷遙樹沙平障晚烟亂帆爭破浪斷岸遠連天野  
渡傷歸客斜陽冷釣船荻花風起處聞雁獨淒然

徐韞奇 一首

韞奇字季華吳江人有西濛吟稿

田家樂

水遶莊窩竹遶牆宛然風景似柴桑  
雨來大竿高荷夜  
秋在鱸魚蓴菜鄉  
戶外最憐楓葉赤  
籬根也有菊花黃  
東鄰穫稻西鄰秫  
勸我先營碌碡場

魏廷薦一首

廷薦字友莊嘉善人有息踵居詩草

家子一畫淵明采菊圖見貽戲作

茅屋四五間修竹一二畝  
東籬繞曲折南山安戶牖  
芙蓉

蓉旣盛開菊又當重九此際陶淵明寧無人送酒

徐開任二首

開任字季重崑山人有愚谷詩稿

朱長孺云季重詩原本少

陵深情至性激發而出使讀之者留連往復而不能自已

咏史

新都居攝時符瑞日盈耳不有翟將軍人心俱已死  
移檄建義旗威名震遐邇時命雖不成稱兵從此始  
悲哉兩黃鵠無人卹義士

送人游下邳

江南春色不勝情，俠士辭家事遠征。  
天下侯王寧有種，世間豎子遂成名。  
故交亂後無同志，羈客愁時有定盟。  
豪氣未除淮海習，知君此去慰平生。

屠

爌 二首

爌字閣伯，嘉興縣學生，有勛齋集。

詩話閣伯言無枝葉行有規矩詩亦雅正不以風華見長

古意

素絲非一絲機中織成帛卷舒生容光從郎自搖襞慎  
勿染為緇終身不見白

贈別素重其

高飛鴻鴈滿關河此日寒江起夕波庾信哀時常作客  
梁鴻去國獨行歌霜淒茂苑清砧急月照荒臺落葉多  
為問吳中舊知己空山叢桂近如何

孫治 二首

治字宇台仁和縣學生有集

詩話宇台刻意

摹古寧質不能

### 渡漳

河北臨大水清漳還濁漳草迷銅雀綠沙走直沽黃疲  
馬愁荒渡飛鳥逐野檣比來憂汎濫何計築渠塘

### 與關六鈐

故人栖託近如何聞道玄亭自詠歌梅福游吳辭宦久  
虞卿去趙著書多秋風絕塞來鴻鴈白露寒塘遍芟荷  
君意陸沉堪寄傲獨慚年歲轉蹉跎

張彥之 一首

彥之 一名慤字洮侯松江華亭人

朱朗詣云洮侯為人寬博

無同異其詩莽蒼不事繩尺質本景純而臻于嗣宗

擬古

小鳥愛初陽交交鳴條柯皎日麗牕牖惠風揚薜蘿  
蘭蕙豈不懷馨香隔巖阿所思悵道遠軒魚寧能過  
仰睇浮雲馳志意成蹉跎烟海既迢遞雲峰亦嵯峨  
百年會有盡日暮徒悲歌

馮班十首

班字定遠常熟人有鈍吟集

陸勅先云定遠詩敦厚溫柔穠麗深

穩美刺有體比興不

清無字不有來厯

詩話啓禎詩人善言風懷者莫若金沙王次回定遠稍後出分鑣並驅次回以律勝定遠以絕句見長大都次回全學温李而定遠多師其源出于才調集也

戲題四韻

三十六鴛鴦輝輝滿路光  
花衫迎日薄草帶引風長  
不隔車中笑從飄過處  
香專城方四十年少不須狂



游仙詩 四首

書邀女伴看桃花  
三鳥回時滿地霞  
記得明朝是丁卯  
青童又合上東華

紅桂開時試舞腰  
素娥爭換白鮫綃  
歸來更按鈞天曲  
吹裂真妃碧玉簫

貪看對奕不歸家  
誰折當門玉樹花  
特勅雷公往追取  
半空鞭下阿香車

玉洞桃花又爛開  
等閒相望隔塵埃  
劉郎也似山中水

一到人間便不回

無題

叢桂風多起夜遲  
柔腸已到九迴時  
瑠璃牕外姮娥影  
喘殺吳牛自不知

雨霽

溪水溶溶拍野橋  
薄雲開日露林梢  
不知一夜前村雨  
多少春泥上燕巢

梅花

長廊盡處是東牆  
柳絮風中見謝娘  
今日不堪簾外樹  
一枝和粉弄殘陽

立春日

梅花拂拂柳參參  
半夜春來睡覺酣  
曾向羅敷牕下坐  
最思朝日到東南

題畫

柳花飛盡綠陰肥  
雨到濃雲濕不飛  
村酒正香茅屋小  
漁翁閒却釣魚磯

董說 十二首

說字若雨烏程人晚為僧名南潛字寶雲有豐

草菴等十八集

詩話若雨腹笥便便未免有才多之恨至其硬語澀體絕不措人方諧涪翁不足比於饒德操  
有餘

讀曲歌

歡是嶺上雲朝往暮來過斜陽照殘雨儂處獨晴多

清明竹枝詞

碧紗轎駐水塘灣  
楊柳風吹燕尾鬟  
要赴燈前絃子社  
莫携儂上虎丘山

南村秋鬼謠

妖狐拜月霜花青  
髑髏騎馬空中行  
秋魂吹作塔鈴語  
叫斷東流一溪水  
鬼車曉喚精靈去  
綠燈移過江楓樹

孟蘭招魂詞

靈風飄幢塔鈴語  
小玉魂歸立秋渚  
只言夜踏陽臺雲  
蒼茫乍隔青楓雨  
擁髻來看水燈綠  
法王正奏無生曲

春日

煮茶烟透綠陰中，遮屋黃茅間瓦松。  
但遣異書供研北，不妨野語聽齊東。  
香拈細雨招新夢，門閉春風仗短童。  
秋色今年應更好，小牕移得碧梧桐。

山行

落日射背木葉滑，橫挑拄杖懸詩囊。  
海天二月發新翠，野廟斷烟生古香。  
洞口楓樹根可坐，山腰亭子名難忘。  
垂藤松鼠忒孤僻，纔遇游人竄道旁。

西溪客過期不至

往昔刻約言不食此回遠游心已貪夜來坐到露花滴  
更復望君蓮葉南眼底青天星四五夢中破琴徽十三  
豆棚放語自清絕莫待霜落分黃柑

蠶豆

誰賦田園雜興辭琅玕記取夏初垂喜看桑底懸新莢  
恰值蠶眠未吐絲細雨賣茶聲過後竹爐燒筍火停時  
沙餅漆榭分前詠豌豆今逢第二詩

秋夜吟

人行積水涯，踏亂青松影。  
吹滅秋牕燈，月白飛光冷。

夢華潭口聽客話嘉隆間大內舊事記之

二首

月華門外轉靈旂，照夜銀盤碧藕肥。  
祠罷天孫桐葉落，君王新賜鵲橋衣。

江南風景藥王灣，霧縠單衣綠玉環。  
紅芍藥邊棋局罷，自裁團扇畫秋山。

秦良玉詞



追奔一點繡紅旗  
夜響刀鏢匹馬馳  
製得饒歌編樂府  
姓名肯入玉臺詩

何述稷一首

述稷字公藝嘗熟縣學生有晴蓑草堂詩集

苦雨

客舍淹淹雨  
春愁甕裏天  
竹含千嶂霧  
柳罨一溪烟  
凍鳥翔還下  
飢蠶起乍眠  
茅柴鄰酒熟  
慚媿貫無錢

朱扉一首

扉字開仲嘉興布衣

詩話開仲弱齡多病終其身不婚獨處深村破  
甑勞薪手自執爨間賦小詩不輕示人簡吳生

一律興

會自如

簡吳生

自誦梅花人日詩五句不見但相思一春多雨愁無麥  
二月輸官定賣絲行藥橋東逢客返著書牕下少人知  
近傳孺子司村社想見鹿豪割肉時

金德開 一首

德開字爾宗蘇州嘉定人國子監生有詒翼堂

詩

紅葉

濃綠看初改江頭日漸紅寒生一樹早秋老萬山同最  
艷朝霜後尤妍夕照中自能成晚興不欲媚春風

奚

濤

二首

濤字大蒙崑山人有肆間堂詩草

雨霽自光福至玄墓

幽尋無定期興發及新霽移舟入林烟登厯從所契杖  
策踰山橋淙淙澗流細蒼松夾道深修竹分離翠草甲  
抽故心梅香有餘蒂登高一憑眺湖水白無際微茫水  
鳥翻斷續雲峰繼有懷云誰思榛苓徒款睇

舟行即事

蟄月江橋外荆扉八九家鶯啼兩岸葉雨漬一籬花溝  
響新流細門抽穉竹斜村農行漸少無處問桑麻

胡山二首

山初名曰新字天岫宜興人僑居海鹽徙嘉興  
梅會里

與彭仲謀

武原吾舊住結屋近滄溟鹽井縈沙曲魚風入市腥秋  
雲蜃浪黑夜雨鬼燈青會有乘槎興還尋織女星

題畫

漁家背山郭門掩青楓樹夜半潮水生孤舟渡江去

李麟友 三首

麟友字振公一字于苑嘉興布衣

沈十二以匹練見遺賦謝

梅溪李生長衣褐冬亦不加夏不脫已經寒暑六七年  
領衽不完襟縫豁沈郎好我情不踈贈我匹練五丈餘  
製以為衣見賓客舉止覺與常時殊鄉人重衣不重德  
談笑從今壯顏色

客夜

夕陰山翠重寒色上河橋夜雨三更鴈秋風八月潮官

亭人寂寂驛路馬蕭蕭  
裘敝經年客歸魂不可招  
登審山有懷周貧沈進諸子

長水通梅里橫山近硤川  
登臨猶可見惜別已經年  
葉落清秋樹鴻飛薄暮天  
故人無恙否却望一淒然

劉純熙一首

純熙字晦生慈谿縣學生

日暮

牛羊下日夕素月柴門生  
宿鳥樹高下微風雲重輕  
孤

村轉閒寂萬象歸虛明地僻無鐘磬惟聞泉夜聲

胡嗣璜 一首

嗣璜字暎日平湖人有墨龕集

秋泛

舟痕移處一溪涼柿葉初紅豆葉黃不獨蓴鱸秋正美  
村醪也自發新香

程用楫 八首

用楫字濟臣休寧人有遜敏居遺草



詩話濟臣詩清真

堅老卓然名家

### 雨宿桃源菴

夕雨四山來奔灑萬松裏卧聞藥銚泉激激聲不止道  
人然松膏中夜更坐起何處一燈青明滅深壑底曉看  
白龍潭應添數尺水

### 慈光寺

神廟賜額

白雲斷峰腰峰下亂松枯盤盤一徑盡金碧見雙闕飛  
閣跨虛空長廊翳修樾風箏四角鳴香氣諸天發緬昔

普門師王城走餅益道感帝后尊帑藏賜禪窟幡幢內  
家製像設天宮豁鬱鬱慈光書銀牘何飛越人代復幾  
何下界事飄忽豈惟陵木拱講席亦消歇我憇娑羅陰  
窺牕賸椽拂三歎出寺門幽篁吐微月

月夜宿院中小閣

暝色起平坡鐘聲滿山戶一禽忽驚聒涼月已復吐牕  
櫺色如水松葉紛可數樹底坐白猿鬚髯極清古

湯泉

黟山峻嶒神所家丹崖石柱攢蓮葩陰陽爐炭熱坎窞  
溫水千斛流澆訝人言驪山亦礪石惟有此地根硃砂  
傳聞軒帝服丹匕肌膚皴裂人驚嗟香泉一浴浸七日  
白龍晝見何衙衙珠衣寶冠照山谷便跨鱗鬣隨青霞  
至今玉壺酌酒處石室尚有樽壘窪嗟予清淨本無垢  
追逐世好羈籠笈裏糧偶到天子鄣解衣初試靈泉涯  
浮丘天子不可見身輕疾愈還足誇山亭晞髮發長嘆  
安得躡足登雲車

喝石居

石室雲正暮溪流聲更長  
嬾殘何處去虎跡滿繩牀  
下食白鷗靜侵階紅朮香  
無人指歸徑獨立殘陽

祥符寺

即軒轅宮

松梢佛剎金銀色傳是當年軒后宮  
陰殿已無丹鼎火古壇惟聽寶幡風  
烟中白鶴參差下屋裏清泉曲折通  
小坐山房話疇昔木蓮花發數枝紅

初冬送友游浙

江水新安淺雲山太末通行吟隨處好烏桕與丹楓

巨門樓

唐人于德晦詩云間倚朱闌頻北望只宜名作  
巨門樓遍詢樓址無一知者成一絕句

千層翠色向空浮百道紅泉石上流間詠唐人舊時句  
朱闌何處巨門樓

戴長汎一首

長汎號澄齋嘉興人有前後征草

苔溪漫步

四野干戈急蕭條此地秋村  
危吠山鬼水鳥狎溪牛落  
葉飛重起哀湍咽更流無才  
堪濟世只合老林丘

明詩綜卷七十九

欽定四庫全書薈要卷二萬五百五十三

集部

明詩綜卷八十

翰林院檢討朱彝尊編

張鹿徵 四首

鹿徵字瑤星後更名怡亦作遺應天人都督可  
大子以府學生承廕歷錦衣衛正千戶甲申陷  
賊不屈受刑潔身歸隱居攝山不出自號白雲  
道者有古鏡菴詩內外集

靜志居詩話山人生時園中鹿亦產子因名鹿  
微而以瑤星為字崇禎間曾任錦衣故其六十  
初度詩云當年執戟侍明光親見彤雲捧玉皇  
也山居鈔書頗多著述甚富予所見者僅玉光  
劍氣集謏聞正續筆數種而已曩造其山居見  
案頭有手抄宋季張炎叔夏詩集一卷今其遺  
書不可復問詩  
亦流傳者寡矣

### 友人移居

居市厭市囂入山苦山僻非山非市間卜茲五畝宅到  
門水一灣眠沙鶴一隻遙望鐘阜巔雲霞幻朝夕乍見  
雨脚沉忽焉晴絮縈主人如冥鴻高舉不可弋丘壑盪



心胸花竹恣夷憚何時載酒過為君理雙屐

送萬年少歸淮揚

握手與子別勸子進一觴風日何黯淡道路阻且長舉  
世矜中行無復狷與狂達人志寥廓世事等粃糠濯足  
臨溪水散髮晞朝陽溪水日東流歸彼百谷王朝陽隱  
豐蔀昏曠鮮晶光擾擾棼絲中誰為振其綱慨彼北風  
詩虛邪徒自傷

雜詩

淺水平沙路淪連續一村夢回天地老亂後友朋存芳  
草生幽澗新鶯語小園看山廣武後久不望中原

送葉榮木入閩

野鶴孤蹤道士顏層林千里入閩關不知烏石峰頭路  
可似江南雨後山

薛暨一首

暨鄞縣人縣學生有面牆小稿

夏日

水閣虛涼枕簟清  
榴花梔子覆牕明  
綠陰滿地日卓午  
卧聽鶯黃啼一聲

陸璉一首

璉字茂璩吳縣人  
兩中武科甲申後  
削髮居蓮子峰下  
自號了緣道人  
有楓江遺稿

題徐元歎落木菴

栖巖有精舍  
窈窕挂藤蘿  
天與幽人占  
山偏落木多  
連峰當戶立  
一澗遶門過  
近有離騷作  
非因學楚歌

張紀一首

紀字齊方崑山人振德子承廕錦衣衛所千戶  
挂冠歸有概菴集

江村春望

春風爛漫遶天涯  
曳杖江村攬物華  
身在故鄉仍是客  
心從安處即為家  
貧來生計號寒鳥  
病後居諸赴壑蛇  
更得幾年還健在  
青門常種邵平瓜

吳璵一首

璵字于庭休寧人國子監生

荅閨人寄懷

東風妝閣厭檐牙  
春鎖重扉樹樹花  
自是王孫歸未得  
漫隨芳草到天涯

龔賢一首

賢字半千上元人

百苦

百苦不一樂中宵  
夢忽清有家長  
作客到老尚謀生  
牆

月背人下野風空自鳴明朝渡江水前路未休兵

楊焯 二首

焯字俊三吳縣人

秣陵雜詠 二首

形勝瞻天闕飄零問故宮人笳淮水北玉露蔣陵東百  
戰黃圖盡重來紫氣空西京耆舊在辛苦說關中  
西望窮牛渚中流雙闕分征帆江外斷鼓角夜深聞地  
擁龍山雪天連鵠塞雲關平飛渡處寂寞百年勳

戴冠一首

冠字峨仲一名易字南枝紹興山陰人有釣臺

詩集

詩話我仲高人與徐孝廉昭法結物外之契嘗賦釣臺詩累百篇託以見志裒而成集覽之未免牽率友人續示集

外詩四首錄其一焉

釣臺懷古

已分垂綸老此生山田是處可躬耕遠携仙女全家隱  
深悔羊裘大澤行一夜星辰凌帝座九重貴賤見交情

請看七里瀧中水未到錢塘徹底清

張

穆一首

穆字穆之東莞布衣有鐵橋山人稿

酬客

吾本羅浮鶴孤飛東海東寧隨南翥鳥不逐雪中鴻坐  
愛千年樹高逾五尺童乘軒亦何苦隨意水雲中

溫

良一首

良字叔子一字散宜烏程縣學生有大愚詩稿



冬日游景谷

寒原林壑靜，獨往暮雲生。  
嶺雪兼山遠，河水激石鳴。  
修篁翻鳥影，古寺報鐘聲。  
塵壒無由到，臨流罷濯纓。

汪中柱一首

中柱字為石，歙縣人，杭州府學生。有光霽軒集。

唐栖夜泊

停橈繫淺岫，寄迹似飄萍。  
稻黍平疇熟，魚鰕晚市腥。  
殘烟籠古樹，遠火映迴汀。  
盍旦爾何意，勞人枕上聽。

陸來一首

來字陶孺吳人

梅花

踏殘山徑草蕭蕭藉有幽花慰寂寥  
幾縷炊烟恒遶屋  
一灣流水慣依橋  
寒輕籬落禽初啁  
春入園林雪未消  
卧後參星橫夜半  
冷香吹夢月迢迢

杜濬十四首

濬字于皇號茶村黃岡人有變雅堂詩集

詩話啟禎之間楚風無不效法公安竟陵者于  
皇獨以杜陵為師是亦豪傑之士惜其阮窮以  
老孟貞曜所云  
好詩多抱山也

### 游夾山漾

出塢謝羣賢放舸理長嘯烟岫映澄波始知所歷妙林  
壑羅秋姿紫翠冑寒照蘋汀欲為雪楓岸忽如燒目逐  
絕境往意愜佳處要層峰何嬋娟灣環亦窈窕泛漾疑  
江湖回帆復蘿蔦面面見道場山名一一一起憑弔尋幽不  
覺遲歸晚顧而笑石門免見訶登樓感同調

九日一草亭時將與天章別感賦十六韻共用日

字

深秋雨廉纖意外晴此日薄雲雖未歸解散已可必危  
坐傷我懷雅意不欲出歛聞良友招不待盥漱畢登高  
一草亭豈在山岑律幽人先入座鳴琴未離膝盤榻但  
隨時杯香帶橙橘暫覺百慮蠲游從任疎密叢菊花故  
遲黃蕊苞漸茁籬蔓弱迎霜宛結小紅實獨感薜荔枝  
來時侔繭栗于今已扶疎殘陰映細帙白頭久飄零俗

態如蟣蟲遙遙三令節過眼一何疾念此動衷腸匪第  
憶家室悵別方自茲歌笑忽如失

揚州雪

揚州雪積如山滿城乞兒盡凍死商人亦覺今年寒客  
子衣單資用竭偏到揚州來看雪雪下白蓑蓑入釜不  
可炊江南亦有雪江北來何為

金山

山從南北望孤櫂始登臨坐覺春雲動行看水國深江

流元自湧天地亦何心獨拜蘄王廟英風爽客襟

登金山塔 二首

極目非無岸滄波接大荒人烟沙鳥白春色嶺雲黃  
出世登初地思家傍戰場吐哉天咫尺消息轉茫茫

薄暮難為狀空中別有聞懸燈江海合望月水分寥  
廓身何在飄零興不羣向來峰頂色看作下方雲

焦山

出郭來差遠憑高望獨深江分神禹跡海見魯連心  
密

竹藏金像回流灌石林擬尋幽絕處却誦白頭吟

芟湄舟中偶成

一雨連三月開帆趁晚晴春風吹岸草知是石頭城

臘盡還冶城寓戲為口號

二首

淮水凍仍綠鍾山燒更青一椽來復去只似短長亭  
妻孥誤見嗔我信如潮汐出門必上元還家必除夕

秦州

窮海三秋盡扁舟百里行夕陽無近色偏照遠帆明

道中望棲霞

目極危巖日下春  
茅君廟裏幾株松  
心知不及中峰宿  
今夜猶聞寺外鐘

佛殿

大樹風多葉盡飄  
莊嚴猶自見前朝  
黑頭江令殘碑在  
不記君王舊姓蕭

白雲菴

松篁自結一幽蹊  
積葉柴門咫尺迷  
我記白雲菴去處



過山又過小橋西

方文 十五首

文字爾止桐城人有金山集

潘蜀藻云爾止詩陶治性靈流連物

態不屑章縫句繪間有幸意之作頗為學者口實不知皆嘔心刻腑而出之者也詩話爾止間作可笑詩句頗為時論揶揄然如嘉穀登場或春或揉秕糠終少于粒米

田居雜詠

平生好結交雅多同契友相見輒稱詩詩罷即呼酒小飲須數升大飲必數斗家貧苦無錢質劑隨所有有時

酤不得顰蹙循牆走百畝今始歸種秫先廿畝秋冬計  
釀數三百六十缶一日一缶傾早晏惟吾取茅堂客來  
過杯竿勿離手爛醉與狂吟兩者俱不朽

華不注

歷城東南隅故有華不注晉師逐齊侯三周即此處其  
山拔地起四面無依附孤峰秀插天娟娟入雲霧我來  
恣游覽艱險殊不顧礫砢千萬石上下無一樹遠望如  
芙蓉菡萏未開露所以名華不古人亦善喻今人罕識

字相呼失其故趙李乃詞宗如何音亦誤

不音芙蓉花跼也趙子昂李

于麟亦誤

### 再游焦山

匡山以續著嚴州以光名二公皆寒士千古垂英聲乃  
知山水性弗以人爵榮我今登茲山緬懷焦先生蝸廬  
僅容膝獨往栖柴荆鄰火延其居露處了不驚斯人胸  
臆間寧復有世情所以京江上名與匡嚴并

### 左蠡行

小艇迎風發，星渚纔到揚。瀾日過午榜，人貪涉不肯停。  
黃昏必抵都昌浦，俄頃狂飈自西來。水聲騰沸山崩摧，  
况兼雷雨助其勢。同舟面色如死灰，急曳半帆回左蠡。  
暝黑仍馳二十里，依稀見岼不得近沙淺。曾無盈尺水，  
終宵飄泊蘆葦邊。風波震蕩誰敢眠，世間平地皆好住。  
何事江湖年復年。

吳門行

一年一度過吳閭，腰下百金千金裝。今年行李獨蕭索。

布衣白恰秋風涼鄰舟新到惠泉酒青錢一緡沽一斗  
顧我囊空無百錢仰視秋天但搔首可憐書劍老風塵  
客路栖遲多苦辛明朝況是重陽節風雨飄搖愁殺人

題張大風山人松石圖

泰山上有百尺松可惜曾受秦時封蔣山下有一片石  
亦受陳時封可惜世間土木本無情且以微寵累其名  
士人守身若處子豈肯輕受微塵滓張翁贈我松石圖  
筆意瀟灑形高孤自言此是唐宋物不是陳卿秦大夫

除夕歎

去年除夕歸自北行李到門天已黑今年除夕客南方  
江路逢兵歸不得山妻凝望眼將穿只道今年似去年  
高樹夕陽鴉影亂尚同小女立門前

湯氏宅

浴罷坐林中開襟受夕風巡檐驚宿鳥滅燭救飛蟲野  
哭聞鄰婦方言報小童夜深微雨過點點在梧桐

攝山絕頂

下方惟見石不信有柴荆仄徑盤空上危峰到頂平夕  
陽千嶺秀春水一江明愁絕浮雲外蒼茫舊帝京

章門訪陳士業故居

南州耆舊近蕭然碩果惟君亦可憐典冊高文傳海內  
短牆破屋住江邊白頭不忍聞時事卓帽相過說往年  
欲訪故人埋骨處亂山孤冢沒寒烟

茗上送曾青藜之吳門

歲暮來游碧浪湖愁看鵝鴨古菰蒲獨携破笠尋山寺

稍喜貧交得酒徒  
往事那能如百粵  
早春端合去三吳  
停舟先問靈巖路  
鄧尉桃花天下無

遇鄉人

君從石城來曾過青溪否  
我家傍青溪門前數株柳

尋陽夜泊

微微秋月照江沙  
兩岼楓林蘆荻花  
苦憶當年白司馬  
不知何處聽琵琶

猷州城



陵陽山下稻花秋  
南陌東阡自一丘  
聞道沉沙多折戟  
老農知是古猷州

舒谿

一灣春水漾晴沙  
兩岸居人十數家  
溪上重尋仙女廟  
門前依舊碧桃花

紀映鍾一首

映鍾字伯紫上元人

城邊路

金  
卷八十  
城邊路歌舞處十年變為墓十年犁為田十年成淺渡

曾傳燦 三首

傳燦字青藜寧都人有止山集

月夜渡淮寄懷魏東房

孤舟夜趁風微波濕星漢四望無一山乃知南北判天  
水搖空翠新月出西岼故人在蕪陰音書未應斷

淮陰釣臺

漢高櫟釜羹劉毅子鵝炙古人恩與仇遂乃在飲食至

今漂母祠朱甍耀霜日

夜坐

古樹搖寒風空牀對羈旅夜坐寂無人孤燈竄蒼鼠

陳祚明 二首

祚明字嗣倩仁和人  
有稽留山人集

北征雜詩

秦郵湖曲路夜半獨行舟  
月出光於水蟲鳴響似秋  
荻蘆明遠岫城闕漾中流  
更照篷牕裏蕭蕭映白頭

送劉石生歸秦中

送爾難為別迢迢惜遠征君言不得意匹馬返西京冰  
雪辭燕市烟花入渭城計程逢改歲千里客裝輕

陸嘉淑

四首

嘉淑字冰修海寧人有辛齋遺稿

詩話冰修崇情遠跡高酣長謠文采風流溢于  
賓座晚雖藏身入海而青蓮在泥心終不染

中秋

長記中秋月當年坐夜闌祇今雙鬢影畏向一輪看節

序驚心換光輝到面寒清尊不堪把哀樂本無端

登縹緲峰

樹杪輕輿去復留百盤初盡午烟收岡巒委地低全見  
墟市浮空翠欲流輕浪受風搖別島斷雲兼雨失前洲  
山根處處堪垂釣何日滄浪具一舟

姑蘇懷古

二首

離離春草射臺迷苦酒城荒舊築低一夜虎丘山下雨  
萬株楊柳綠初齊

戰殘江郭楚公旗野笛吹過短簿祠  
山上有城人不識  
蛇牀花滿舊時基

韓純玉

十一首

純玉字子蘧歸安人修撰敬少子有蘧廬詩集

詩話中吳韓君望西湖韓子蘧皆輯明一代之  
詩君望曰詩存子蘧曰詩無惜其書均未布通  
都二子先後奄逝其家人故友  
不復肯出恐終歸覆醬而已

雜感 二首

穠矣棠棣華開當芳春時繁霜將洊至何為發高枝霜

飛一何早花開一何好但恐忘憂萱化作斷腸草  
蓼蟲及桂蠹甘苦各自安賦性固有在分定不可干我  
珮雖言雜豈克椒與蘭

游黃龍洞望太湖

登山水始白映水山更青山水相照耀萬象無遁形遙  
天覆笠澤遠岫浮洞庭羣峰七十二散布如漂萍遊雲  
變湖影長風吹溲冷中多萬斛舟揚颿無時停東流趨  
瀚渤北望窺支硎直欲傲廣漢豈止欺濁涇端冠危

石崔嵬復瓏璽混沌不自惜穿鑿疑五丁險怪駭神鬼  
鬱積生雷霆深淵開絕頂習坎類井陘井收原勿幕天  
闕終未扃神龍在其下屈伏猶蝮蛭潛雖勿當用時或  
肯效靈春秋虔祀典歆享惟德馨遺黎苦旱魃好雨亦  
既零吾來恣憑眺徙倚觀翠屏漁歌和樵唱風磴連雲  
汀時見莓苔際古人曾勒銘撫掌笑伯益失載山海經

題張鐵橋畫馬

鐵橋年已七十五醉裏踰蹇拔劍舞餘勇猶令筆墨飛



迅掃驂騮力如虎維繫蕭蕭古白楊四蹄卓立明秋霜  
昂然顧盼氣深穩風髮霧鬣非尋常用之疆場一敵萬  
如何間置荒坳畔壯心烈士悲暮年永日披圖發長嘆

鼠晝遊

嗟爾穿墉物晝遊安所之見人空有禮出穴竟無疑五  
技未曾有兩端宜自持漫漫失長夜此去亦堪危

春日過金陵

策馬丹陽道行人白下來山青龍虎地草綠鳳凰臺舊

苑花仍發新亭客自哀  
蒼茫風景異懷抱幾時開

菱湖晚泊

望望武林城扁舟兩日程  
遙峰天際沒孤月霧中生  
澤國長多盜荒村亦駐兵  
昇平何日事把酒壯心驚

楚歸歲暮江行雜詠

二首

久泊忽開艫鄰舟欵乃同  
沙明千里雪帆借半江風  
皖口之京口吳宮望楚宮  
溯洄尋往蹟泯滅亂流中

一舸乘流下臨風望玉臺  
遠帆如不動近筏忽浮來  
水

過潯陽急山從建德開長江天作塹此際重徘徊

寓興國寺作

擔簦栖古寺倚杖識殘碑柏樹傳神禹桃花祀息媯尋  
幽歸路晚望遠下山遲浩浩長江水東流到幾時

自注興國

寺古柏相傳大禹手植息夫人廟在桃花洞稱桃花夫人

起戢

江中順流而下逆風使帆也

江舟強于邁風水力相爭潦尾循環見波心曲折行持  
盈看往復濟險任縱橫閱世從吾術危塗處處平

楊 炤 二首

炤字明遠先世清江人移家長洲補縣學生有

懷古堂詩選

顧與治云明遠詩一  
往超詣出人意表

詩話明遠詩評者比之

雪山醜黜吾嫌其太滑

長蕩春汎

春心不自抑率意為歡賞既洽尋山興復生涉江想恰  
當風日佳悠然進蘭槳綠楊映垂垂黃鸝鳴兩兩此時  
盡一尊浩歌激清響遙望秦餘山開懷對西爽斜陽半

村戶遠岸挂漁網  
逶迤出前浦  
蒼蒼月初上

戲詠

顏子陋巷居安貧  
固為好萬一受命  
長簞瓢至於老  
此時白髮翁非肉  
則不飽百年常飢  
飭無乃太枯槁

安夏二首

夏字大已無錫  
人有九龍山樵詩

雜興

日日雙扉掩經旬  
罷整冠夕陽僧寺  
遠秋雨女蘿寒有

竹深藏屋無花強倚闌  
新來緣病懶不上釣魚灘

初秋寄友

年年秋水碧連天  
望斷江楓釣雪船  
彭澤柳絲疎野岼  
邵平瓜蔓冷湖田  
謀生計拙重憐病  
排悶詩多或廢眠  
牢落故人空入夢  
豈徒雙鬢轉蕭然

方授一首

授字子留桐城縣學生有奉川草

野外

野外無拘束青鞵東復西山行憑一杖草宿慣雙谿滑  
想流匙飯甘餘入饌雞何時與兒子隨意得幽栖

俞南史

一首

南史字無殊吳江人

僧舍尋武伯不值

竹戶籬闌一徑深獨來惆悵對空林寒梅白徧春山曲  
只在花間不可尋

顧樵

一首

樵字樵水吳江人

題吳儀部讀書處

軒牕面水畫常開  
嶺樹千重入座來  
二月山城飛燕子  
啣泥先到讀書臺

鄧森廣一首

森廣字東之桐城人崇禎中貢生有杲園集

巫山高

巫山峭石與天齊  
巫山峽裏白雲低  
行人莫向巫山路



猿到巫山亦夜啼

陸繁昭 一首

繁昭字儼胡一字拒石錢塘人

晨步韜光道中示移暉上人

苔徑凌晨步  
籬花帶露垂  
溪雲流不盡  
海日起何遲  
往  
事每多悔  
他生未可期  
不如歸  
白社杖履日相隨

馮愷愈 五首

愷愈字濟仲一字道濟慈谿人元颺子有涉江

錄西江詠

贈別方爾止

豐山西距蜀山東廿載賓朋聚散中  
賸我孤遊尋舊壘  
把君好句弔秋風  
雨侵水榭更籌澀  
淚逐歌筵蠟燭紅  
斗酒更要連日醉  
老年兄弟幾宵同

舟中寄六弟

家園花事總參差  
舊種新栽繫遠思  
木筆纔移成玉樹  
櫻桃小接是垂絲  
曾教隴鳥分明語  
未絡珠藤一两枝

憑仗六郎勤看取三三徑裏好題詩

榕堂雜詩 三首

紅牌祖訓甚分明進講詞臣合講經  
白日雷霆臣萬死

尚聞天語喚先生

黃公道周平  
臺召對事

片語誰傳人不死一時萬口沸都城  
嚴霜獄底黃詹事  
捧血淋漓寫孝經

蘆花殘月并蕭蕭曾囑金風玉體調  
華表夢中先得路

歸魂只溯海門潮

孫公碩膚没于海外  
蘆花洲上丁丑春公與計偕  
夢身卧狀元坊下南

宮既捷常歎其無徵及寔骨處乃國初張狀元墓道也公昔投予手札有金風方厲玉體善調之語

謝

晉

一首

晉字無可晚更名孔淵會稽儒學生

贈余若水城南隱居

宇內忽岑寂草木黯不芳獨有歲寒姿勁節凌清霜  
平居慕栗里松柏猶未荒此生但飲酒笑傲同羲皇  
時會既已殊意計難可量遙遙北郭望淒風起白楊  
故知年壽永不若名行章哲人秉嘉德自使寵辱忘  
屈伸歸里

道出處隨天常葛巾漉糟粕短襪歌滄浪古人不可即  
日月長杳茫

錢肅潤 一首

肅潤字礎日無錫人有十峰草堂集

和徐窳之九日雨阻堆山園居

間居今日易行路古人難舟楫江方永干戈枕不安遠  
烟千嶂合積雨一天寒此際逢重九茱萸未忍看

陸世儀 一首

世儀字道威太倉州人有桴亭稿

夜泊鹿城

渡頭星月暗離思滿歸舟此夜聞風雨山城一片秋

顧

超

五首

超字子超吳縣人

詩話韓高士洽有明詩存選本其最心折者子超之長歌大約兼仿溫飛卿李長吉而神明之惜其全稿求之不得吳徵士景果偶得鈔本錄其五詩當崇禎之際吳俗談詩者多惑於楚人之味以空疎蕭寂相尚若子超之出入經籍卓然羣雅之遺

封山亭

鶴艇蕩鷗沙游人在空曲  
年年采香處露冷蘭苕綠  
憶昔風雨中高牕幾回宿

鄭駙馬家

南國織錦愁花草春如翦  
腰裏女蘿叢陰風落紅蘚  
非無十畝宮漸逐耕犁轉  
石馬嘶入潭金盞不成繭  
夜半玉簫鳴君蒿發淒泣

東村

名山名勝聞九州可以卜居非一丘昔人競誇西蔡麗  
吾來獨愛東村幽梨紅柰紫櫻桃赤雨後落花分五色  
腰鑿手甕鮮游民出入無非灌園客桃源去俗僅一塵  
孤花片水猶迷人此間高峙浪千尺無怪從來少問津

梅花 二首

香雪伶仃瘦莫支玉壺冰滿漏遲遲寒生紙帳春多夢  
影過銀屏風倒吹遙憶斷橋無月夜最憐蕭寺閉門時  
梨花白燕空惆悵前後相思兩不知



凍碎玻璃片片冰珍珠簾外雪層層飲教月落重開閣  
坐到星殘不用燈谷口去年曾送客嶺頭今日又逢僧  
江山無限留情處幾欲携家竟未能

鄭女冢

自滌金粉割紅絲桃杏無顏五百年晉日尼師皈白佛  
唐家貴主事金仙春寒宿草猶迷蝶露濯空桑欲化蟬  
幾處禁烟人涕淚玉棺風雨但聞鶻

詩話鄭駙馬冢在洞庭山駙馬生女示疾不嫁  
舍身為尼葬于山中釋竇唱比丘尼傳晉土比

丘尼自洛陽竹林寺淨檢始唐會要睿宗第八  
女金仙公主入道蝶用韓馮事蟬用齊女事用

古却似

玉溪生

蔡仲光

三首

仲光字大敬蕭山人

涼州辭

賀蘭千嶂朔風秋萬里黃河入塞流滿地霜華邊月冷  
最傷情是古涼州

排遍

水調聞歌淚滿裾  
思君遠戍十年餘  
秋來無數南飛鴈  
不寄雲中一紙書

送趙魯存北還

蒼茫秋色滿江關  
客子孤蘆鼓櫂還  
河北諸君猶健否  
近聞半入太行山

項聖謨一首

聖謨字孔彰  
秀水人

客虎丘中秋無月

驚心吳楚客，倏忽度中秋。  
明月生何處，微風倚寺樓。  
孤吟淹北渚，極目望西疇。  
夜靜風傳柝，江臯動遠愁。

侯

檠

一首

檠字武功嘉定人

酬別徐李白

滄江倚櫂且高歌，游子銜杯意若何。  
亂後飄零親戚少，天涯縱跡別離多。  
已悲楊柳愁中折，况遇賓鴻客裏過。  
握手相期須努力，風塵十載莫蹉跎。



明詩綜卷八十

欽定四庫全書蒼要卷二萬五百五十四

集部

明詩綜卷八十一樂章

翰林院檢討朱彝尊編

慶成宴

靜志居詩話明高皇帝渡江丙午十二月命立郊社吳元年丁未國丘方丘社稷壇成園立在京城東南正陽門外鍾山之陽方丘在太平門外鍾山之北社稷壇在宮城之西南洪武元年戊申正月南郊即位是年十一月冬至祀南郊禮成行慶成禮翼日大宴十年丁巳帝以分祭天地揆之人情有所未安命舉合祀之典即園丘舊址為壇而以屋覆之命名大祀殿十一月

始合祀天地于奉天殿詔自今以首春合祀于南郊十一年戊午十月大祀殿成自是命太常每歲合祭天地于春首至嘉靖九年因夏言之請改議分祀其詳載嘉靖祀典兩朝樂章詞臣分撰雜以曲譜合乎雅頌者寡令擇稍典麗者著于編慶成宴樂章十五年正月定一奏炎精開運之曲再奏皇風之曲三奏春皇明之曲四奏天道傳之曲五奏振皇綱之曲六奏金陵之曲七奏長楊之曲八奏芳醴之曲九奏駕六龍之曲

皇風被八表熙熙聲教宣時和景象明紫宸開繡筵龍  
袞曜朝日金鑪裊祥烟濟濟公與侯被服麗且鮮列坐  
侍丹宸罄折在周旋羔豚升華俎玉饌克方圓初筵奏



南風繼歌賡載篇  
瑤觴欣再舉  
拜俯禮無愆  
同樂及斯辰  
於皇千萬年

右再奏

周南詠麟趾  
卷阿歌鳳皇  
藹藹稱多士  
為楨振皇綱  
赫赫我大明  
德尊踰漢唐  
百揆修庶績  
公輔理陰陽  
坐令八紘內  
熙熙民樂康  
氣和風雨時  
田疇見豐穰  
獻禮過三爵  
歡娛良未央

右五奏

長楊曳綠黃  
鳥和鳴  
菡萏呈祥日  
麗風清及時  
為樂芳尊在  
庭管音嘒嘒  
絲竹泠泠玉  
振金聲  
各奏爾能皤皤

國老載勸載懲明德惟馨永保嘉名無已太康哲人是

聽右七奏

夏王厭芳醴商湯遠色聲聖人示深戒千春垂令名惟  
皇登九五玉食保尊榮日昃不遑餐布德延羣生大庖  
具豐膳鼎鼐事調烹豈僅資肥甘亦足養遐齡達人悟  
茲理恒令五氣平隨時知有節昭哉天道行右八奏

嘉靖祀典九年七月禮部議覆中允廖道南疏  
云慶成宴有平定天下撫安四裔車書會同表  
正萬邦天命有德五舞又有仰天思感地德  
之曲載于會典或當時詞臣所撰猶為可觀

# 太廟時享

詩話太廟時享春以清明夏以端午秋以中元冬以冬至洪武二年正月定議行之迎神樂奏中和之曲初獻奏壽和之曲武功之舞亞獻奏豫和之曲文德之舞終獻奏熙和之曲文德之舞徹饌奏熙和之曲

還宮奏安和之曲

慶源發祥世德惟崇致我眇躬開基建功京都之內親  
廟在東惟我子孫永懷祖宗氣體則同呼吸相通來格  
來崇皇靈顯融

右迎神

承前人之德化家為國母曰予小子基命成績欲報之

德昊天罔極殷勤三獻我心悅懌

右終獻

顯兮幽兮神運無跡驚馭逍遙安其所適其靈在天其

主在室子子孫孫孝思無斁

右還宮

## 太學釋奠

詩話洪武元年二月以太牢祀先師孔子于國學八月遣官釋奠于先師孔子五年尊孔子封號曰大成至聖文宣王六年八月翰林承旨詹同學士樂韶鳳等上所製釋奠先師孔子樂章迎神奏咸和之曲莫帛奏寧和之曲初獻奏安和之曲亞獻奏景和之曲終獻與亞獻同徹饌送神俱奏咸和之曲

自生民來誰底其盛維王

嘉靖中  
勅改師

神明度越前聖粢帛具

成禮容斯稱黍稷非馨惟神之聽

右奠帛

大哉聖王

嘉靖中  
勅改師

實天生德作樂以崇時祀無斃清酤

惟馨嘉牲孔碩薦修神明庶幾昭格

右初獻

百王宗師生民物軌瞻之洋洋神其寧止酌彼金罍惟

清且旨登獻維三於戲成禮

右亞獻終獻

犧象在前豆籩在列以享以薦既芬既潔禮成樂備人

和神悅祭則受福率遵無越

右徹饌

有嚴學宮四方來崇恪恭祀事威儀雖歆茲惟馨神  
馭還復明禋斯畢咸膺百福

右送神

### 雩祀

詩語嘉靖九年禮臣等議曰月令仲夏大雩帝  
用盛樂春秋左氏傳龍見而雩後世此禮不傳  
而在位者遇旱暵之災往往假異端術士祈禱  
誣亦甚矣今請於郊兆之旁擇地以為雩壇每  
歲孟夏以後舉行陛下於孟春上辛既祈穀于  
上帝矣自二月至四月時雨而雨時暘而暘則  
大雩之祭陛下可免親行遣官代之若其雨澤  
愆期則陛下躬即其地以行禱祝其作樂陳舞  
宜仿古昔之儀庶於禮為不失也十一年又進  
議曰郊以禮為重雩以樂為主合照園立樂舞

之數以四方之色成樂舞之服庶稱古人盛樂  
皇舞之制兼請三獻禮成之後九奏樂止之時  
命詞臣撰括雲漢詩詞別製雲門一曲使文武之  
士青衣執羽竝舞而合歌之乃定議迎神奏中  
和之曲奠帛奏肅和之曲進俎奏咸和之曲初  
獻奏壽和之曲亞獻奏景和之曲終獻奏永和  
之曲徹饌奏凝和之曲送神奏清和之曲望  
燎奏太和之曲祭畢使道童歌雲門之曲

百川委潤名山出雲愆暘孔熾膏澤斯屯祈年于天載  
牲于俎神之格思報以甘雨 右進俎

### 立春特享武宗

詩話嘉靖十四年二月重修太廟立春特享九  
廟於武宗迎神奏太和之曲初獻奏壽和之曲

亞獻奏豫和之曲終獻奏寧和之曲  
徹饌奏雍和之曲還宮奏安和之曲

列祖垂統景運重熙於惟武皇昭德勅威用翦除姦兇  
大業弗隳專廟以享經禮攸宜俎豆式陳庶幾來思

### 圜丘

詩話圜丘樂章二首嘉靖初大學士霍韜撰  
嘉靖祀典不載殆進呈而別用他人之作也

昊天在上我祖在側我奠我幣於焉踧踖昊天在上我  
祖在旁我奠我帛於焉皇皇天佑皇祖錫我民祜

右奠帛

巍巍蕩蕩帝德無象無曰無象昭昭在上蕩蕩巍巍帝



德無為無曰無為下式九圍服帝之德朝乾夕惕庶幾  
無斁帝心悅懌右送神

升祔

嘉靖中定

詩話嘉靖十七年七月上興獻王尊諡曰知天  
守道洪德淵仁寬穆純聖恭儉敬文獻皇帝廟  
號睿宗九月升祔于廟迎神樂奏太和之曲初  
獻奏壽和之曲亞獻奏豫和之曲終獻奏寧和  
之曲徹饌奏雍和之曲送神奏安和之曲皇妣  
慈孝貞順仁敬誠一安天誕聖獻皇后升祔樂

同章

酌彼鬱鬯玉瓚是將敬哉奉盈有餘其香儼皇祖在上

八聖在旁合享交歆神容洋洋右初獻

改上成祖謚號

詩話嘉靖十七年九月更太宗文皇帝稱成祖  
迎神樂奏太和之曲舉冊寶奏熙和之曲初獻  
奏壽和之曲亞獻奏豫和之曲終獻奏康和  
之曲徹饌奏永和之曲送神奏安和之曲

高皇謨烈我祖是成誕垂裕于後昆孝孫是徵援今稽  
古薦茲尊稱奕奕闕宮歲事有恒子子孫孫百世其承

右送神樂奏安和之曲

伐倭告祭南郊

嘉靖中撰

天啓有明百神率職殄逆助順無征不克九州奠安維  
帝之德載獻載趨既齊既稷


告祭北郊

粢盛既潔齊明是將精誠感通昭格洋洋威稜贊翼我  
伐用張邊燧永清海波不揚

詩話魏樂府不成於曹劉而成於繆襲晉樂府  
不成於潘左張陸而成於傅玄宋樂府不成於  
鮑謝而成於何承天北齊樂府不成於蕭愨而  
成於陸印皆屬恨事明洪武樂章率出四學士  
之筆嘉靖樂章率出議禮諸貴人之詞假孝陵  
改命伯温李迪永陵改命穉欽君采則其辭定

遠追吳斯考父之盛  
不若是之懦鈍矣

明詩綜卷八十一



總校官庶吉士 臣張能照

校對官檢討 臣蕭九成

謄錄監生 臣劉天蒼

謄錄監生 臣李本

欽定四庫全書薈要

集部

明詩綜卷八十四

二五

詳校官編修臣汪鏞



欽定四庫全書會要卷二萬五百五十五 集部

明詩綜卷八十二 宮掖

翰林院檢討朱彝尊編

愛一首

愛字善理鳳陽人宣宗聞其才召至京病卒贈

國嬪

顧玄言云貴嬪事見淑秀集其自哀古體源出蔡文姬得性情之正

京邸病革自哀

脩短有數予不足較也生而如夢兮死則覺也先吾親

而歸兮獨慚予之不孝也心悽悽而不能已守是則可悼也

司綵王氏一首

南海人宣德中女官

顧玄言云司綵宮詞道麗亦椒庭之豔發者

靜志居詩話官官之設見于周官見于戴記漢魏置貴嬪夫人貴人此仿周官之三夫人也淑妃淑媛淑淑儀修華修容修儀婕妤好容華充華此仿周官之九嬪也北史后妃傳有正華令則修訓曜儀明淑芳華敬婉昭華光正昭寧貞範弘徽和德弘猷茂光明信靜訓曜德廣訓暉範敬訓芳猷婉華明範豔儀暉則敬信此仿周官之二十七世婦也穆光茂德貞懿曜光貞疑光範



令儀內範穆閏婉德明婉豔婉妙範暉章敬茂  
靜肅瓊章穆華慎儀妙儀明懿崇明麗則婉儀  
彭媛修閑修靜弘慎豔光漪容薇淑秀儀芳婉  
貞慎明豔真穆修範肅容茂儀英淑弘豔正信  
疑婉英範懷慎修媛良則瑤章訓成潤儀寧訓  
淑懿柔則穆儀修禮昭慎貞媛肅閏敬順柔華  
昭順敬寧明訓弘儀崇敬修敬承閑昭容麗儀  
閑華思柔媛光懷德良媛淑猗茂範良信豔華  
徽娥肅儀妙則此仿周官之八十一御女也唐  
宋以來參合損益不廢其名明初定設六局曰  
尚宮尚儀尚服尚食尚寢尚功掌以宮正總六  
局之事凡出納文籍皆印署之付內史監牒移  
于外局有四司尚宮之屬有司紀司言司簿司  
閏尚儀之屬有司籍司樂司賓司贊尚服之屬  
有司寶司儀司杖司飾尚食之屬有司饌司醞  
司藥司供尚寢之屬有司設司輿司苑司燈尚

功之屬有司製司珍司絲司計司練掌儲藏段  
尺者也官設于洪武五年王氏家南海河南村  
永樂二年選入宮命與權妃同輦辭曰妾妾婦  
也安敢充下陳哉帝重之許歸嗚呼開創之主  
宮中府中設司分職各有典司后正位乎內夫  
人嬪御交贊陰教居有保阿之訓動有環珮之  
響內無出間之言權無私溺之授法至善矣其  
後宮官罷設奄寺乃得橫行王振汪直劉瑾惡  
已貫盈至魏忠賢攬政昵一客氏深宮更無為  
懿安皇后助者雖存女秀才女史官空名恒罰  
提鈴警夜而宮官大抵皆為奄寺之菜戶矣外  
而稅礦內而批紅監軍則養寇賊至則開門貽  
禍之烈一至於此使女官舊章不廢褱衣褱翟  
絳紗貂蟬雍雍肅肅何遽稱九千歲于大璫之

前乎

宮詞

璫花移入大明宮一樹凝

一作旒  
旒濃

香倚

一作韻

晚風羸得

君王留步輦玉簫吹徹月明中

詩話元制歲貢高麗貢美女故張光弼輦下曲

云宮衣新高麗樣方領過腰半臂裁連夜內

家爭借看為曾著過御前來楊廉夫元宮詞亦

云北幸和林愜殿寬句麗女侍婕妤好官君王自

賦昭君曲勅賜琵琶馬上彈明初相沿未改此

孝陵有碩妃長陵有權妃也權為高麗光祿卿

永均之女善吹簫宮中爭效之寧獻王詩云宮

漏已沉參倒影美人猶自學吹簫王司綵云羸

得君王留步輦玉簫啾啾

月明中皆為權貴妃作

沈瓊蓮 七首

瓊蓮字瑩中烏程人弘治初選入掖庭官女學

士

詩話魏有女侍中晉有女尚書迄于唐宋若華姊妹五人皆善文昭義節度使李抱貞表薦于朝德宗召入宮試詩賦兼問經史大義深加歎賞不以宮妾遇之呼為女學士貞元後宮中記注若華掌之繼而若昭若憲代司其籍烏程女子沈瑩中初入掖庭秦陵試以守宮論發題云甚矣秦之無道也宮豈必守哉秦陵大悅擢居第一給事禁中授女學士吳興人至今呼為女閣老瑩中在大內暇飼白鸚鵡教之誦尚書無逸篇此宜載之管彤者也

寄兄

疎明星斗夜闌珊玉貌花容列女官風遞一作度鳳皇天

樂近雪殘

一作晴

鴉鵲曉樓寒昭儀引駕臨丹宸尚寢熏

鑪熟紫檀肅肅六宮懸象魏春風前殿想鳴鑿

送弟溥試春官

少小離家侍禁闈人間天上兩依稀朝迎鳳輦趨青瑣  
夕捧鸞書入紫微銀燭燒殘空有夢玉釵敲斷未曾歸  
年年望汝登金籍同補山龍上袞衣

宮詞 五首

翠絲蟠袖紫羅襦  
偷把黃金小帶輸  
中使傳宣光祿宴  
內家學士出新除

青霧濛濛罩碧牕  
青燈的的燦銀缸  
內人何處教吹管  
驚起庭前鶴一雙

豆蔻花封小字緘  
寄聲千里落雲帆  
一春從不尋芳去  
高疊香羅舊賜衫

天子龍樓瞥見妝  
芙蓉團殿試羅裳  
水風涼好朝西坐

專把書經教小王

明牕棊几淨爐熏閒閱仙書小篆文畫永簾垂春寂寂  
碧桃花映石榴裙

范氏一首

清江人

一新云

惇孫女早寡選入禁中偶題画寄

意高后見之封為夫人遣還鄉

詩話明初識字婦女秀才入尚功局萬載縣志  
載縣民教用敬妻易淵碧洪武二十六年舉女  
秀才以疾還鄉又中都左衛千戶陳泰圓妻龍  
玉英孀居亦舉女秀才洪熙元年封大樂賢母

范氏殆  
其選也

題老嫗騎牛吹笛圖

玉環賜死馬嵬坡出塞昭君怨更多爭似阿婆牛背穩  
笛中吹出太平歌

曹靜照 六首

靜照字月士宛平人泰昌元年選良家女入宮  
李自成犯闕隨內監劉至南京開剃為尼

宮詞 六首



到面東風只自知  
燕花牌子手中持  
椒房領得金龍紙  
勅寫先皇御製詩

一樹寒花冒雪開  
幽香寂寂映樓臺  
女官爭簇傳呼近  
知是鸞宮選侍來

寶妝雲髻躡金衣  
嬌小丰姿傍玉扉  
新入未諳宮禁事  
低頭先拜段純妃

口勅傳宣幸玉熙  
樂工先候九龍池  
裝成傀儡新番戲  
盡日開簾看水嬉

閱遍司農水旱書君王減膳復齋居御廚阿監新承旨  
明日羹湯不進魚

儉德慈恩上古稀他方織錦盡停機赭黃御服重經澣  
內直才人著布衣

詩話諸詩見紅蕉集其云泰昌元年選良家入  
宮按慶陵在位祇一月實錄所載禮儀房長隨  
董國用將宮女趙永祿等八口發其親戚領去  
於時魏給事應嘉疏言怨女出宮古來盛德之  
事自穆廟至先帝兩朝凡五十餘年矣其間侍  
從宮人空閒無職何啻千萬數人情垂老倍思  
其鄉即此一事不必問有例無例慨然獨斷施  
行則仁慈無極言雖未見行然不聞有選良家

女子之事當再  
考之故老野史

宋蕙湘 一首

蕙湘南京宮女年十四遭掠

題汲縣壁

風動江空鼓鼓催降旗  
颺颺鳳城開將軍戰死君王繫  
薄命紅顏馬上來

明詩綜卷八十二

欽定四庫全書薈要卷二萬五百五十六

集部

明詩綜卷八十三

宗潢

翰林院檢討朱彝尊編

秦藩二人

朱敬鏞

一首

敬鏞字季量秦愍王榘八世孫有自吟亭詩草

靜志居詩話季量詩太淺率曩富平李孔德曾以秦藩二詩集見貽久乃失去不復再覩當更

訪之

江邨雨夜

驟雨連山黑，荒邨夜色侵。  
瀟瀟露暗壁，颯颯動秋林。  
江鴈濕難度，草蟲寒更吟。  
愁人當此夕，寂寞倍關心。

朱誼斗 四首

誼斗字子斗，秦愍王九世孫。有集。

詩話：子斗才情橫溢，極為富平、李孔德所稱覽。其祀竈，千一百二十字，雖未悉工，而浩漭不可也。及

雜詩

歌罷不受盈橐籥出以虛持是律吾躬可以例卷舒澡  
髮奉嚴訓兼受詩與書砥礪慎立節鄉里流歎譽世變  
觸駭浪時窮遁荒墟昔為桂與蘭今為櫟與樗昔出擁  
高蓋今行無柴車舊交零落盡羸老隨樵漁里正肆搜  
括唾面不敢除內省雖不疚旁觀嗤賤愚惓焉顧墳墓  
不忍捐此軀強顏留續息不絕將焉如

冬日開元寺訪子新茂之不遇

世變僧猶在城崩寺尚存終傷游客少益信法王尊欲

雪天垂暮重霾地轉昏無緣逢二妙愴怳返荒邨

祀竈詩

旅食隨遷次僑居傍酒壚饕飮資釜甑炊爨立庖廚曲  
突焦埃墨橫牕黯垢污水妃臨正位火德稟神符五祀  
由三代諸卿暨大夫精禋煩祝史側媚矧亡俘臘月驚  
春早溫風感歲徂幸存恒跼躅申禱敢踟躕汎埽勞箕  
帚香燈照墜塗主人虔跽拜子姓儼奔趨白犢何年有  
黃羊此地無豚肩虧博碩菟體潤彫枯莫薦先陞竈尊



崇復奧隅硬錫黏簋簋瑣果罍盤孟裸地宜如在登天  
諒不誣赫烟騰阜蓋烈燄走駢駒謁帝攀金陸朝元集  
絳都奏章通太乙關請浼靈巫昭格惟聲響微情竊覬  
覷干戈逢喪亂墳墓幾榛蕪樵采悲翁仲椎埋泣湛盧  
孫階馴稚犬子舍保童烏日日牀邊筆年年戶左弧空  
齋留破硯寒食酌芳壺別有深祈願因之切歎吁壹戎  
初底定百揆待匡扶庶窳窳窺台鼎將軍戀鼓枹武功勤  
遠略文教未全敷偽俗澆淳朴訛言扭誑諛閭閻驅罔

象闌閭竄於菟怪蝎歎永過妖蛟挾浪鹿颺颺來廣漠  
電雨墊平塗麥豆餘萁蔓樓臺毀漫圻劇聞填漉灞幸  
不到江湖嶺嶠雖枝葉邦畿實榦株北辰當紫禁南極  
邈蒼梧鄭使終歸晉山公豈患吳城階聞羽籥府藏朽  
彤弧持戟頻逃伍探丸賸有徒殘邨憑賂免完堡受兵  
屠城郭稀鳶鵲郊垆沸螻蛄風黃馳響馬月黑嘯封狐  
濟濟寧多士盈盈燦麗姝巧鬟垂項領驪帽綴瑠瑜章  
句深穿鑿衣裳侈僭踰彩豪矜不律繡袪壓諸子廢壘

招屯種新畬怕責租瘡痍兼稊稗脂髓怯錙銖隱沒棲  
丘貉飄飄泛水鳧市魁爭狡獪里正肆挪揄是事誰為  
宰斯民望愈孤中央甦混沌儵忽謝鑽刳號慟投鋌斲  
神通返體膚至仁迴浩蕩大智用模糊輿蓋還高下圓  
方備楷模一元調玉燭七政順璇樞化育殷亭毒形生  
盡息蘇真官辭旭殿恩詔下雲衢黃雀酬陰隙金雞宥  
罪辜八風推鉅鞴二氣湊鈞爐民物更鎔鑄人才誕聖  
儒九重陪舜禹六合際唐虞勲伐追伊傅文章襲典謨

經綸恢寓縣禮樂耀寰區  
篋業銷鋒鏑艤舫洗舳艫  
匪躬稼穡率土罷徵輸  
雪夜輕收蔡炎荒薄渡瀘  
蕭牆安鄴邱社稷定顛  
臾比屋擔珪組吞舟決  
網眾吳禽歸翡翠越樹  
却珊瑚嘉運爭寧謐彝  
倫罔斃渝孔懷諧伯仲  
好合共妻孥朋類堅膠  
漆姻聯託柿柎過庭承  
對問入里應歌呼機杼  
家家錦耜耨處處珠醴  
移甘井水飴變苦原茶  
綠濺沉浮蟻青乾子母  
蚨中州囚獬豸北海放  
駒駝鸞鷺重銜錄龜龍  
再啓圖君臣交警戒朝  
野洽

歡娛粟帛兼頒賚鐘鏞畢賜酺千秋亨大有萬國信中

孚婺婦憂忘緯終軍慨棄繻請纓傷耆老攬鏡媿蒼鬢  
不忍懷迷寶深愁厠濫竽向空書咄咄凌險視瞿瞿蓬  
堵慚令我瓜田守故吾無能安硯礫何計出崎嶇司命  
如瞪目迷魂似隕軀依稀聞咐囑叱吒戒誇訐忌諱時  
難觸嫌疑世所拘挈鉗他自哲躍治爾何愚足繭防蹉  
跌脣絨慎囁嚅耐寒饒契闊獻歲在斯須更始邀光寵  
維新就快愉權宜綏福履次第啐屠蘇涸轍啾窮鮒歌

巢哺好雛探環驚了了啼牖聽呱呱華表晨歸鶴松門

夜訴語漸添丁熾盛全減涕沾濡道苑行舒轡詞場且

弄觚晤談來勝侶傲睨狂奴譽聞身文繡哦吟口豢

芻但拚佳興致莫恨久衰癯恍若施鍼石幡然已痛痛

引吮餐沆瀣透頂灌醍醐洵澤開融面陽林圻凍跌鶯

花催爛漫紅紫雜縈紆哀樂情非異飛潛迹固殊密雲

懸沛澤其雨斷斜晡霜戟休酣戰曦車弭迅驅會留三

舍景未照及桑榆

題旅舍

空有千金意難酬一飯恩再來逢漂母不復念王孫

周藩 五人

朱安汎 二首

安汎周定王楠玄孫

夏夜寄懷謝山人時客汾陽

良夜孤清賞懷君倍黯然客星一以別明月幾回圓紫  
塞雲邊樹青山雨後天相思何處寫隨意有冰絃

送李子和山人遊西蜀

諭蜀文誰著風流漢長卿欲投巴子國定向錦官城羸  
馬衝山色哀猿雜樹聲武侯遺廟在瞻謁重含情

朱睦㮮

三首

睦㮮字灌甫號西亭周定王六世孫萬歷初舉  
宗正有陂上集

詩話西亭以好客聞藏書為海內第一世所傳  
萬卷堂書目不列卷數撰人非故籍也予家藏  
有聚樂堂藝文志四冊俱詳列卷數撰人係陂  
上鈔本曩孫侍郎耳伯筮仕祥符從西亭子竹



居交契借鈔經解頗多令  
其撰述十存一二而已

### 送舜符

疇昔慕游遨與君數朝夕稍申初服懷共結沉冥跡促  
膝究微言披情閱仙籍盼睐恣丘樊留連眷泉石星霜  
歛云變婉變成離析撫景念夙懽即事興今戚末路誰  
能同素心不可易淒淒冬日黃渺渺寒流碧暫舍故園  
林遠適京華陌時有北風來因聲慰岑寂

送鄭處士信之還歛因憶同游諸君子

同調日云稀憐君復遠  
違青山雙屐在白首一  
帆歸野燒浮殘雨寒林  
散夕暉因茲憶疇昔相  
對各沾衣

荅田六深甫鄭二信之過陂上

豈是譚經所真成載酒  
廬竹停仙客騎花翳孝  
廉車乘燭驚山鳥調琴  
出浦魚悠然對孤嶼宛  
在水中居

朱睦橫一首

睦橫字仁菴周定王六世孫  
輔國中尉其子勤此輯其詩  
及已作下及孫朝瑿題曰三  
業集

送春

風吹飛絮點池蘋  
無那傷春又送春  
試上驛樓高處望  
落花無主更愁人

朱勤炆 二首

勤炆號南渚睦橫子封奉國將軍

學仙

學仙貴養氣舉世少其真  
放之彌六合返則在吾身  
日月卒有毀藥石寧足珍  
非吾好妖妄但為知者陳  
巖穴

亦多誤不獨朝市人

朱仙鎮岳王祠

未遂黃龍飲金牌止渡河艱難終奉詔痛哭乃迴戈三  
字翻成獄千秋尚輓歌不知廊廟計何苦但求和

朱朝瑿一首

朝瑿字汝升號崇岡勤灶子

郊居雜興

杏花漠漠柳參參路出隋隄十里南一夜水深三十尺

朝來網罟集深潭

齊藩二人

朱慶槩

一首

慶槩字仲望高皇帝第七子溥封于齊建文元年廢為庶人永樂初復封四年奪爵安置廬州子孫俱為庶人散居南京慶槩有籜冠集

王元美云

王孫詩能直寫胸臆  
不剽襲人自合古轍

秋日送李文仲訪友新安

正值悲搖落那堪送客舟  
白雲江上晚紅樹驛邊秋  
細雨潤琴幔涼風添酒籌  
逢迎有知己暇日即登樓

朱承綵一首

承綵字國華齊王孫

送茅平仲

置酒長干路譚深夜未闌  
山川牽恨遠風雨逼年殘  
天迴孤帆沒江空獨雁寒  
從茲君別去月共幾時看

魯藩二人

朱觀焜 二首

觀焜字中立鉅野僖順王玄孫封鎮國中尉有

濟美堂豪

詩話中立好為詩雖格調卑卑亦復自喜嘗輯山東諸家詩曰海岳靈秀集

趙康王哀詞

帝子東平侶浮名夢已殘叢臺春色冷澗水舊盟寒客散誰彈劔花飛自繞闌茫茫天地外何處駕青鸞

送毛教授還山

未老思投老欲歸便得歸  
緇塵今漸遠不上芰荷衣

朱頤塚 四首

頤塚魯荒王檀七世孫  
封鎮國中尉

登兗州城樓

步上西城樓北望傷我心  
秋風吹大陸落日薊門陰  
玄霜被寒渚白鴈號中林  
孤飛何栖止嗷嗷悲不禁  
怵惕結心曲歸寫丘中琴  
朱絃感人意淒然發哀音  
中夜不能寐撫桐獨沉吟



寄懷邢子愿侍御

相憶未相識高名空復聞  
時因薊北鴈一望濟南雲  
謝傳青山屐羊欣白練裙  
風流誰可再千載獨夫君

賦得為我彈鳴琴贈王生

憐君多雅調為我彈鳴琴  
曠矣丘中賞兼之物外心  
夜深山鬼泣江淨水龍吟  
曲罷無人解松風披素襟

蟋蟀

蟋蟀關何事哀音入夜偏  
寥寥閒永漏切切亂鳴絃  
乍

逐微風斷還從疎雨連閨中有思婦怪爾不成眠

遼藩一人

朱術均一首

術均字均焉簡王植七世孫輔國中尉換授鎮  
江通判遷戶部主事有綦組堂集

詩話明初舊典宗室子不與內外銓除後因御  
史李日宣等所請援祖訓換授之法言皇族宜  
通任藉得旨允行寧王孫子斗詩云爵人本至  
公立法無頗偏大訓手自訂百度何森然郡王  
有孫子所司驗才賢換授準任用升轉遵常銓  
諒哉二柱史抗章排拘孽先帝展科目令皇命

試官椅桐委斷壑被以朱絲絃詞駟在外履策以珊瑚鞭蓋紀其事也天啓辛酉晉藩慶成溫穆王表桐之曾孫慎荃始舉辛酉山西鄉試明年壬戌賜同進士出身除中書科中書舍人歷精膳主事至崇禎戊辰寧藩瑞昌王孫統帥由進士改庶吉士累官南國子祭酒自後甲戌則蜀藩奉鈔寧藩統鈺鈺謀埒子也丁丑則寧藩統鎮統鏗庶辰則周藩朝壺在鈔寧藩統鈺癸未則代藩鼎婁廷塔寧藩統鏞議汴皆以宗支取甲科而均焉得授鎮江通判其官戶部陝西司主事曾召對平臺奏請仍設漕運總兵而思陵不允也後賊既陷秦廷臣有撤寧遠守關門之議思陵心動以問羣臣吳太常麟徵昌言撤之便而輔臣陳演力持不可而止使關門有備而漕運有兵互相聲援何至巨寇如入無人之境哉然則均焉所對亦曲突徙薪之一策也均

馬詩多至數千首率爾而成不費持擇元夕詞  
結句與白傳歌舞屏風花障上幾時曾画白頭  
人同一  
懷已

元夕詞

春風如箭月如梭  
良夜匆匆瞥眼過  
聽到衆中喧笑處  
老年人少少年多

寧藩七人

朱多燬二首

多燬字宗良寧獻王六世孫封鎮國中尉有朱

宗良集

詩話宗良佳句頗多如關山曉月趨三輔鴻雁  
秋霜度九河太室出雲來苑裏黃河如帶挂城  
頭路經軒后臨戎坂山接高歡  
避暑宮格調高華惜全詩未見

雨

觸石陰霞北嶺遙逗風寒雨入簷飄天涯故舊惟孤枕  
篋裏衣裳祇敝貂綻雪蘆花紛歷歷經霜楓葉莽蕭蕭  
還應撼郭濤聲急只怪空江上夜潮

塞下曲

平明飛騎扣關門漢將新收吐谷渾從此天山傳白羽  
不教公主嫁烏孫

朱多炆

八首

多炆字貞吉寧獻王六世孫封奉國將軍卒後  
私謚曰清敏先生有勸游藁

詩話貞吉與從兄多炆用晦竝有詩名用晦與  
金德甫交契王元美入之續五子之列然其詩  
無足觀不若貞吉之有爽氣也貞吉好游變姓  
名為來相如蹤跡遍吳越間其子謀墀亦效之  
變姓名曰來鯤字子魚出游吳楚有集行世臨  
川湯若士為之序所傳溪樓連夜雪山縣隔年

春其警  
句也

### 送蔡氏

為別既不易贈言良獨難  
小人各自媿君子乃憂歎  
投漆必以膠合椒必以蘭  
子其寧爾心失意古所安

### 十四夜玩月

玉繩界西陸澄空淨如澣  
庭柯泣零露早見圓景滿  
悄焉增永懷頓令衣帶緩  
四氣無終極人生一何短  
心悲  
雍門操淚隕山陽管  
徂謝子山丘悽其我  
華館臨觴慘

不怡憂來莫能款

龍沙

龍沙駐蹕地皇祖紀南征草昧君臣定壺漿父老迎平  
臨章貢水遠視灌嬰城今古雄圖在低徊落照明

對雨

苦雨何曾歇愁陰暗不開春寒緜氏嶺雲暮楚王臺戲  
水饑鳶過寨簾濕燕來靜看雙屐齒無事長莓苔

別胡雲從



故侶三年隔離懷一醉銷烟花桃葉渡春草豫章橋末  
路難為別名山許見招天涯惟有夢相逐往來潮

張敘甫園中牡丹作千花賦此賞之

暮春之初天氣新日日銜杯誰主賓石家錦幃四十里  
漢闕粉黛三千人清絲急管巧相聒伏雨闌風橫見陳  
繁華狼籍且如此不醉恐礙花神嗔

寄黎君實司訓

君才不薄廣文官依舊青氈一片寒家近郵筒傳自數

地偏書籍借應難懷人夜雨薜蘿草留客春風首着盤  
聞道出游堪累月祇餘山色滿吟鞍

泊長蕩

蒹葭一望暮蒼蒼長蕩湖頭烟水長怪道今朝楓葉盡  
夜來七十二橋霜

朱多燠 一首

多燠字知白寧惠王第四子石城恭靖王奠堵  
之玄孫

詩話南昌郭外有龍光寺萬歷乙卯二月豫章  
詩人結社于斯宗子與者十人知白之外則宜  
春王孫謀刻文翰瑞昌王孫謀雅彥叔石城王  
孫謀璋鬱儀謀圭禹錫謀珩誠父謀塿藩甫謀壘  
辟疆建安王孫謀鼓更生謀聖禹卿謀劄緝其  
詩曰龍光社草郡人都察院右都御史掌工部  
尚書事徐作汝念刑部  
主事張壽朋冲蘇序之

## 秋日社集

躡步出郭門涼沙朗朗日迤邐入叢林花宮眩丹漆巍  
巍豫章臺萬木四排比

音必從白香山讀

高讌集友于討論及

刊述清風吹素襟古調和瑤瑟會心豈在遠快意亦多

術遙睇天際帆翩翩若風乙

朱謀璋 四首

謀璋字鬱儀寧獻王七世孫以中尉攝石城王府事既卒豫章人士私謚貞靜先生有枳園近

藁

雷元亮云鬱儀古體出入漢晉溫厚典則近體頡頏初盛高渾雄麗而又弘之以典籍參

之以多聞  
足以名家

楊計部曙宇載商甕漢壺千里相餉短篇志謝

古陶出古丘閔深容斗許駁犖繡土花不知幾寒暑使

君河北來載以入東楚欣然脫相贈何異獲鐘呂謂予  
古人風因之代縞紵豈無珠玉珍雅志非其所摩挲三  
歎息高誼誰當侶寘彼圖史間春秋惟爾汝

送黃貞父入覲

脂車秣良駟冠蓋如雲浮駕言趨上京述職遵諸侯王  
事既有程肅肅塗路修及茲正元初奉璋覲宸旒君抱  
廊廟資高視徧九州出兼卓魯聲入與夔龍游翔螭作  
時雨膏澤布陵丘壇石百里城豈足長淹留揆予慕高

義夢想託綢繆賦詩申素衷  
踈踏翰墨儔清風播蘭茝  
令德樹千秋願崇華岱尊黃髮長優游

送姚龍文還永嘉

百卉懷芬芳當春欣所觀  
時風和且柔好鳥鳴其間  
萬彙何熙熙我思獨盤桓  
良友當遠別惜此會面難  
握手臨郊衢一往莫可攀  
願得少須臾言笑暫為歡  
毋金玉爾音慰我遲暮顏

燕至

芳草無數綠雜花相間紅誰將雙燕至一一舞春風

朱謀晉 五首

謀晉字康侯更字公退寧獻王七世孫有羔鴈

淹留蕪城中車四集

姚園客云康侯詩如雨斷山青霞催月出清冷之中

每成豔境又云南昌王孫多稱詩而康侯拔出

客秦郵呈別閩使君

淮田三歲潦民已半為魚日下司農檄星馳使者車市  
烟初寂寂鄉夢亦蘧蘧刺史今元結瘡痍可漸舒

甲寅春日江村即事 三首

水市沙墟地更偏，卑棲無用買山錢。  
荒厨慣乞漁家火，行李時登估客船。  
鐵柱江聲連野郭，香爐雲氣隔湖天。  
游蹤到處堪經月，豈待男婚女嫁年。

綠水園亭白版扉，輪蹄出郭到應稀。  
江雷乍殷龍兒長，社日初晴燕子飛。  
飯熟東田觀午饁，酒香西舍典春衣。  
長堤何處無芳草，莫怨山中客未歸。

江邨負郭坂田多，田舍風光草樹和。  
孤鳥立殘牛背雨。



小魚吹散鴨頭波，買山忽被高僧笑。  
擊壤閒聽老父歌，猶幸代耕餘薄祿。  
門無胥吏夜催科。

寄賀文湛持入東閣

焚魚學士最清華，五世承恩太史家。  
歸沐不言溫室樹，入朝時草內廷麻。  
吳中舊宅卑依市，都下新堤淺築沙。  
儻為故人炊脫粟，青門來種邵平瓜。

朱謀埭 一首

謀埭字藩甫，寧藩石城王孫。

九日誠甫宗侯招登明遠樓讌集分韻得無字

有約登高興不殊  
天涯朋好接歡娛  
寒生南浦楓初落  
秋入東籬菊尚無  
詩派西江存大雅  
賓筵左顧敕中廚  
風前剩有參軍帽  
醉後終須倩客扶

朱謀圭 一首

謀圭字禹錫石城王孫

秋日龍沙社集

結駟城外游春此  
郊原靜崎嶇陟龍沙  
悠然見西嶺風

日暢幽懷烟光澹雲影松門初地開清磬出禪境黃菊  
籬下繁紅芙蓉木末冷心目既雙清和歌荅佳景擾擾塵  
埽中真樂誰其領

瀋藩六人

朱恬爍一首

恬爍號振菴沁水莊和王仲子封鎮國將軍

李時

遠云振菴詩圓

熟動合矩矱

詩話振菴五言入格如雲迎芝蓋轉花傍藥欄  
開寒葉飛官路霜風滿驛樓香雲飛貝葉法雨

下天花不失  
為初唐人語

送吳平川判府致政歸桐城

歸路東風晚，悽心向夕烟。  
青山相送日，白首倦游年。  
人渡春江上，帆飛暮雨前。  
知君投老去，生事在林泉。

朱恬煥一首

恬煥號達菴，沁水莊和王叔子封鎮國將軍有

達菴集

李時遠云達菴古詩近  
邊近體有韋柳風致

感遇

候蟲鳴虛堂明月照高樹佳人  
不我過相思隔雲路人生無  
百齡奄忽若朝露努力求功名  
名成髮已素窮通各有時達人  
守天賦

朱理溜一首

理溜字純甫恬爍子封輔國將軍有玉田集

時李

遠云玉田近  
體爽朗瓌奇

長信怨

永巷風偏入深宮月易斜空牀  
愁獨守中夜起長嗟託

意題團扇驚心見落花思君情不極惆悵減容華

朱垚圪一首

垚字崇甫恬爍子封輔國將軍有玉澗集

李時

遠云玉澗諸體皆備  
簡逸華麗兼而有之

芳樹

嘉樹畫芳菲重重在春苑風來翠幄寒日映朱簾卷嫩  
萼正歲蕤柔枝亦繾綣不惜與君攀無令歲華晚

朱垚圪一首

理圻字京甫恬婉子封輔國將軍有玉林集

再逢友人

道遠頻馳夢情深祇寄書相逢俱淚下翻似別離初

朱效錫一首

效錫字馴甫封奉國將軍有壺峰集

夏日讌伯王園

避暑梁王苑樓深翠竹間風生三徑爽日映八牕關作  
賦依芳沼開尊對遠山中林容小阮醉後未言還

唐藩三人

朱碩爌 二首

碩爌字孔炎唐定王桎五世孫封鎮國中尉有

南陽集

詩話南陽公子博雅工文  
所為詩頗饒錢劉風致

送王山人游楚

門前楊柳樹風亂麴塵絲日暮臨溪別春帆適楚時人  
烟揚子渡山木偃王祠處處生芳草悠悠千里思



邵山人子俊見過話游梁事

有客擔簦過草堂一尊風雨話游梁  
鴈池寂寞芙蓉冷  
逢著行人說孝王

朱器封一首

器封字子厚碩爠子有巢園集

詩話子厚入兗州四十二  
子之列而集不見傳

游仙

劉安守天厠彼乃赤帝精  
左右在帝側翱翔排玉京  
白

雲蔽丹巘五鳳啾啾鳴石階秀朱草餌之可長生舉手  
謝人世爾曹等蒼蠅

益藩 一人

朱常法 一首

常法字幼良益端王四世孫

古怨

妾思亂如絲纏綿無斷絕難將摻摻手解得心中結

明詩綜卷八十三